



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.143/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Kymete Kicaj kryesuese, Skender Çoçaj dhe Arsim Hamzaj anëtarë, duke vendosur përkitazi me ankesën e Subjektit Politik Partia Liberale Egjiptiane (PLE), paraqitur kundër Subjektit Politik Iniciativa e Re Demokratike e Kosovës (IRDK), për shkak të pjesëmarrjes së fëmijëve në fushatë zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 24.01.2025, merr këtë:

V E N D I M

I. Pranohet e bazuar ankesa e subjektit politik Partia Liberale Egjiptiane (PLE), Anr.143/2025 e datës 23.01.2025, ashtu që subjektit politik Iniciativa e Re Demokratike e Kosovës (IRDK), për shkak të pjesëmarrjes së fëmijëve në fushatë zgjedhore, i shqiptohet dënimi më gjobë në lartësi prej 1500 (njëmijepesëqind) euro.

II. Detyrohet Subjekti politik Iniciativa e Re Demokratike e Kosovës (IRDK), që gjobën e shqiptuar si në pikën -I-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datën 23.01.2025 PZAP-i, ka pranuar një ankesë nga Subjekti Politik Partia Liberale Egjiptiane, ku pretendohet se kryetari i partisë Iniciativa e Re Demokratike e Kosovës-IRDK, në të cilën theksohet se më datën 21.01.2025, në profilin e tij në facebook ka publikuar një video incizim përkatësisht Spot Politik, ku shihen fëmijët e moshës së mitur nën 16 vjeçare, në këtë mënyrë Elbert Krasniqi, në cilësi të kryetarit të IRDK-së, në këtë incizim ka keqpërdorur fëmijët e mitur kinse duke bërë prezantimin e kinse të arriturave gjatë mandatit të tij si ministër i MAPL-së. Më tej parashtruesi i ankesës ka theksuar se me këto veprime i njëjti, ka keqpërdorur fëmijët e mitur, sidomos ata të moshës nën 16 vjeçare, duke e ditur se fëmijët janë kategori e ndjeshme e shoqërisë dhe ekspozimi i tyre është i kundërligjshëm dhe bie ndesh me nenin 45, par.3 të Ligjit NR. 06/L-084 Për Mbrojtjen e Fëmijëve, që ka të bëjë me mbrojtjen e fëmijëve në masmedia, ashtu që me këtë nen është e përcaktuar se "Mjetet e komunikimit masiv, përfshirë mediat e shkruara dhe elektronike, botimet, televizionin, radion, reklamat, kinemanë, internetin dhe mediat online, portalet, janë të obliguara që të

kontribuojnë në mënyrë aktive për të afirmuar mbrojtjen e fëmijës me realizimin e veprimtarive vetëdijesuese dhe duke këshilluar publikun mbi ndikimet e mundshme negative që ekspozimi ndaj mediave mund të ketë mbi fëmijën".

Në përgjigjen në ankesë të Elbert Krasniqi, Kryetar i Iniciativës së Re Demokratike të Kosovës - IRDK, përfaqësuar nga Eros Gashi, i kundërshton si të paqëndrueshme pretendimet e palës ankuese, edhe atë për shkak se sa i përket pretendimit të palës ankuese se Elbert Krasniqi, Kryetar i Iniciativës së Re Demokratike të Kosovës - IRDK, ka kryer shkelje duke vepruar në kundërshtim me nenin 45, par. 3 të Ligjit nr. 06/L-084 për Mbrojtjen e Fëmijës; shqyrtimi i kësaj çështje është jashtë juridiksionit të PZAP, kjo pasi që PZAP është organ i përhershëm, i pavarur dhe kompetent për të vendosur në lidhje me ankesat e lejuara që kanë të bëjnë me procesin zgjedhor siç është caktuar me Ligjin Nr.08/L-228 për Zgjedhjet e Përgjithshme në Republikën e Kosovës, Ligjin Nr. 03/L-072 për Zgjedhjet Lokale në Republikën e Kosovës dhe me Rregullat zgjedhore, ashtu që PZAP mund të vendos për ankesa lidhur me çështjet e përcaktuara taksativisht me këto akte ligjore e nënligjore dhe jo bazuar në Ligjin nr. 06/L-084 për Mbrojtjen e Fëmijës.

Ndërsa sa i përket pretendimit të palës ankuese se Elbert Krasniqi, Kryetar i Iniciativës së Re Demokratike të Kosovës - IRDK, ka kryer shkelje duke vepruar në kundërshtim me nenin 5, par. 3 të Rregullores Zgjedhore nr. 07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar, me të cilën përcaktohet se "Asnjë subjekt politik i certifikuar nuk mund të angazhohë persona nën moshën pesëmbëdhjetë (15) vjeç në fushatë zgjedhore. Pjesëmarrja e fëmijëve në fushatën zgjedhore, nuk mund të bëhet pa prezencën apo pëlqimin e prindërve"; i njëjti pretendim nuk qëndron, pasi që në pamjet e video incizimeve, me mbishkrimin "Voto 111", numër me të cilin IRDK garon në Zgjedhjet Parlamentare: a) janë ekspozuar foto të realizuara nga aktivitetet zyrtare të MAPL dhe jo nga fushata, respektivisht të njëjtat janë foto nga inaugurimi i projektit "komunat për të rinjtë" dt. 22.12.2022 dhe dt. 31.04.2024.

Si provë ka bashkangjitur Fotot e postimeve të ministrit Elbert Krasniqi dt. 22.12.2022 dhe dt. 31.04.2024; të njëjtat foto kanë marrë karakter publik që nga ajo datë dhe nuk janë kundërshtuar nga personat e autorizuar që kanë dhënë pëlqimin dhe b) të njëjtat nuk përfshijnë veprime, akte, shenja, apo forma të tjera të mbështetjes aktive të fushatës nga personat e ekspozuar në foto, por ngjarje të vizitave zyrtare të Elbert Krasniqi't si Ministër i Administrimit të Pushtetit Lokal, ashtu që të njëjtat nuk përbëjnë "angazhim" dhe as "pjesëmarrje" të personave nën moshën pesëmbëdhjetë (15) vjeç në fushatë, sepse nuk përfshijnë asnjë formë veprimi aktiv nga ana e tyre, që do të mund të interpretohej si "angazhim" apo "pjesëmarrje" në fushatë.

Marrë parasysh të lartcekurat e kundërshtojnë në tërësi ankesën e palës ankuese dhe kanë kërkuar që e njëjta të refuzohet si e pabazuar.

PZAP-i, pasi që shqyrtoj dhe vlerësoi pretendimet ankimore gjeti se:

Ankesa është e bazuar

Paneli ka gjetur se nga fotografitë dhe nga video incizimet e ofruara si provë nga parashtruesi i ankesës, të cilat gjenden në shkresat e lëndës, në mënyrë të padyshimtë ka konstatuar se subjekti politik IRDK gjatë fushatës zgjedhore në spotet e tyre kanë marrë pjesë edhe fëmijët, veprime këto në kundërshtim me dispozitat ligjore të nenin 5, par. 3 të Rregullores Zgjedhore nr. 07/2024 për Fushatën e Zgjedhjeve, Monitorimin e Fushatës së

Zgjedhjeve dhe Deklarimin Financiar, me të cilën përcaktohet se "Asnjë subjekt politik i certifikuar nuk mund të angazhojë persona nën moshën pesëmbëdhjetë (15) vjeç në fushatë zgjedhore".

Paneli, me rastin e vendosjes i shqyrtoi pretendimet e subjektit politik IRDK, në kuadër të pretendimeve të theksuara në përgjigje në ankesë, por për Panelin këto pretendime ishin të pabazuara nga se nga video incizimet e ofruara si dëshmi nga subjekti politik PLE shihet se në llogarinë IRDK dhe kryetarit të këtij subjektit politik Elbert Krasniqi, në rrjetin social facebook është shfaqur video spot me pjesëmarrjen e fëmijëve, njëherit ky spot është shfaqur gjatë fushatës zgjedhore për përfitime të votave dhe përmban numrin identifikues 111 të këtij subjekti me të cilin numër garon për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025.

Andaj paneli vlerëson se veprimet tilla janë në kundërshtim me dispozitat ligjore të LZP.

Paneli me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, subjektit politik që ka bërë shkelje të legjislacionit zgjedhor, apo ka bërë shkelje të legjislacionit edhe në proceset e mëparshme zgjedhore, që konsiston në faktin se subjekti politik IRDK, ka qenë i njoftuar me obligimet dhe përgjegjësit gjatë procesit të fushatës.

Keshtu që duke u mbështetur në nenin 117.3 të LZP-së ku përcaktohet se "vendosja për ankesat nga PZAP-ja mbështetet në dëshmi të qarta dhe bindëse", Paneli vlerësoj se pretendimet e tilla janë të bazuara, për faktin se nga veprimet e përshkruara në ankesë nga parashtruesi i ankesës paraqesin shkelje të dispozitave të lartcekura, dhe të njëjtën e pranoi të bazuar.

Nga arsyet e theksuara me lart, e në kuptim nenit 118 paragrafi 1, dhe nenit 120 paragrafi 1 nën paragrafi 1.3, të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtrësia
Anr.143/2025 datë 23.01.2025

Kryesuesë e Panelit
Kymete Kicaj



Këshilla Juridike: Kundër këtij vendimi nuk lejohet ankesa konform nenit 118 par. 4 të LZP-së.